


嘉興府志

廿一二

十一



漢書門類			
九	一〇	七	九
一	一	三	九
六	三	三	九
册	架	函	號

內閣文庫			
九	一〇	七	九
一	一	三	九
六	三	三	九
册	架	函	號

內閣文庫			
番號	漢	9079	
冊數	16 ( 11 )		
函號	292	67	





五

嘉興府志第二十一卷

淺

賜進士中憲大夫知嘉興府事安成劉應鈞重修

賜進士奉政大夫南刑部郎中郡人沈堯中編纂

賜進士朝列大夫南國子祭酒郡人馮夢禎參攷

嘉興縣學生員屠中孚校正

項復亨



漢

張武由拳人武幼時父蒙為郡掾送太守妻子還鄉至河內遇盜戰死武少長奉遺劍求父死所祭



泣瀕絕悲感傷人太守第五倫嘉其行舉孝廉遭  
母喪過毀尋卒

宋

衛公佐字輔之華亭人事繼母至孝族有不能婚  
嫁者公悉爲遣之聚書數千卷禮四方賢士教訓  
子弟時縣未有學捐地爲址又獨任禮殿之後熙  
寧末饑疫邑人賴以救療元豐中復饑民皆負稅  
令滿代者已至轉運使苛留使督逋負縲繫盈庭  
公佐悉出粟代輸之弟公亮公望並敦行義時人

俱爲推重

陸墳字子應崇德人事繼母至孝與弟垓不異產  
從叔唐老死其母無所依收養二十年如一日垓  
先沒懷思不已因名其墓曰懷有益齋集十卷墳  
子鑣孫德輿皆舉進士德輿字載之有文名官至  
吏部尚書墓在縣西北六里弟文輿按察司判官  
宋亡歸隱

趙善應字彥遠漢王元佐之孫建炎間與其父申  
國不求避地崇德之洲錢遂以爲家流離感慨見



諸篇釋其詩有曰飄泊南來幾歲寒追譚往事謾  
心酸雲煙暮隔中原望歸折梅花忍淚看善應性  
純孝嘗刺血和藥愈母母畏雷雷輒走護之寒夜  
歸恐擊門驚母露坐達旦官江西兵馬都監每四  
方水旱警報輒不食同官燕會頻盛曰此豈爲樂  
時耶尤衰稱爲古君子陳福公題其墓曰篤行子  
汝愚第進士

元

孫宣字恭然有俠氣兄弟析居並以義讓元季苗

兵將屠邑境宣獨叩軍門乞貸辭嚴義正主帥壯  
之乃釋不屠著有道德經註子午流註通論等書  
潘應定嘉興人事母至孝母喪廬墓有白鶴翔集  
黃桂素華之異周伯琦榜其墓所曰雙禎

過宗一海鹽人蚤喪父獨與母居至正間張士誠  
陷姑蘇略地至海上宗一負母逃與寇遇欲殺之  
以身蔽母中數創賊舍而去既返益困傭以給食  
母卒六年不克塋寢苦服衰不變與人語輒泣下  
白燕巢其室東西相向及塋燕不復來



嘉興府志 卷之二十一 三  
戚敬字秉肅嘉興人母病醫藥弗効剗股肉以進  
母不能食而死敬痛絕再三既葬結庵墓傍伏匿  
其中墓產白芝五本又欲像母事之工莫能也敬  
伏墓號哭不已母忽見夢于工明日工肖而像焉  
敬奉之如生士誠陷吳將逼秀里人皆遁敬曰吾  
忍舍父母坟墓耶乃散財集子弟保鄉里寇至多  
所焚掠敬所居白苧鄉獨完有司論其功謝曰敬  
爲墳墓計敢希賞乎後部使者薦爲文學掾十年  
不調

皇明

殷近仁嘉興人家貧與弟原善友愛無間洪武初  
近仁舉孝弟知平遥縣獻所著蒞政戒銘二十四  
篇擢廣西叅政與妻皆卒官所遺三男一女咸幼  
原善遂不娶撫諸孤如已出親友諷之娶原善泣  
曰兄嫂不幸皆早世遺孤纍纍使我娶而不賢則  
諸孤將安托哉且娶者以爲後也諸孤當有爲吾  
後者娶復何益終不復娶撫教婚嫁皆得其所鄉  
邦稱義焉近仁祀學宮鄉賢



嚴震字宗遠嘉興人。世本儒醫。震早喪母。事父至孝。父常患危疾。震謂非藥餌可療。禱于天。割股肉爲羹。進之。父疾立愈。同時有甯冠者。崇德人。亦割股活其祖母。人並稱之。

章普音嘉興縣永安鄉人。父早世事母。徐至孝。母嘗患心疼。普音即奉香路拜往普陀。以禱獲覩。顯應他日。母復患傷寒瀕危。普音割股肉爲羹。以進。未愈。一夕割胸取肉。復和粥進之。母食頓愈。新城吳槐者。母病草焚香籲天。割右股肉爲羹。以進。母

延數日而卒。

顧昌嘉善人。母年八十餘。苦下痢。昌日就里中真武祠祈禱。願以身代母病。日甚。乃操刀入祠。割胸探其心。不得。割傷膜。爲羹。進母。時母以數日不食。聞羹香。欲食。食之頓愈。

崔永字彥齡。海鹽人。七歲喪父。其母韓氏。更里人。桑慎從戍海南。永思母不置。遂徒步走海南。行次瓊州。得見母。會慎歿。永求歸母所。司不可。永哀請于朝。許之。歸舟遭風。母失水。永入水負母。得活。永



嘉興府志卷之二十一  
竟以寒疾死江西布政使茹大素塋祭之海南人  
至今稱崔孝子云

沈壽康字原懋海鹽人早歲爲州吏養親至孝親  
歿塋祭如禮廬墓敝衣菲食終身焉晚習經學有  
解悟信道甚篤識度絕人南臺論薦官之不就洪  
武初知縣王文表其村曰孝隱

夏正字時寅海鹽人性孝友親歿廬墓事其兄宗  
如父鄉里稱之

童輝字景文海鹽人鎮江府經歷母蚤世事父孝

養備至年已老猶戀戀如嬰兒鄉黨稱孝焉

秦涇字汝清平湖人幼喪母哀毀不勝服除像事  
之如生及事繼母失愛涇事之益謹撫異母弟尤  
篤卒回母心父卧病鄰火及卧所扶昇不及涇但  
叩頭籲天風反火滅父歿廬墓終喪知府鄭登高  
勘覈上聞未報而卒

鄒昊嘉善人母老失明日夜籲天後數年復明鄉  
里異傳其事

夏瑞海鹽人幼喪父事母至孝母患痼疾醫不能



療割股以進得愈知縣李頌旌其門

顧薇海鹽人性至孝童時父母有小疾即憂形于色湯藥必嘗年十八母李故哀慟頓絕良久乃甦水漿不入口者三日潛刻一木肖母像事之如生出入必涕泣以告一日號呼不已木母忽作聲呼其名家人聞之大驚比隣失火將延及伏棺慟哭火回棺卒無恙又繼母盛不善視薇事之如李不少違母卒化為慈人稱爲顧孝子仇必達弟必顯奉化人國初隨舅氏戍海寧與兄

武昂季弟必侃同居爨相友愛內外無間言里人匾其居曰和樂堂必顯道遇殍骸白必達殮之隨施棺以殮鑿路井五十以濟渴正統七年官軍杜忠等戰溺沈家門七日不食必顯捐粟募筏救之得生者七十二人

周玘嘉善人景泰中兄當戍五開玘年十七慨然請代父兄不許有司亦難之玘曰家貧役重非兄侍養莫慰親心請益力官不能奪既之戍業裕嗣昌人以爲友愛所致



陳源字本深

性孝友好施父遺盡讓之兄

弟成化壬辰歲大祲爲粥以食饑者好納四方遊士戶履恒滿詔賜壽官粟帛

徐藻字子縈司訓縉子本邑庠生痛父縉罹倭毒具奏召集鄉兵滅賊以雪父冤得旨名曰忠孝軍乍浦沈庄俱有戰功軍門優獎

沈槩字一之嘉善人勵志飭躬非禮不動事父母竭盡孝養居喪蔬食三年卧起不離于次家居考定四禮多取文公家禮爲則而尤嚴于喪祭一時

稱其好古執禮在邑庠當貢輒讓其友最復貢至京遥拜江西布政司都事有古人風今祀鄉賢

凌孝子失其名嘉善人永樂中南弱冠父以典稅被誣逮繫京師孝子號慟上書明父非辜遂得釋水陸風雨備嘗艱苦遂以是殞人共惜之

鄒昊嘉善人母年七十因夫袒故哀慟喪明昊延醫治之不愈朝夕禱祝祈以身代俄而母兩目中各重生一瞳復明如故人謂之孝感云

莫藏字用行海鹽人博涉能詩性孝母卧病父又



嘉興府 卷之三十一  
患疽瀕死皆割股療之所著有珮觴稿詠史詩素  
軒藁五音字書辯訛

周文忠字德茂崇德人性孝友兄遭寇掠躬急其  
難母胡氏疾甚多方救藥弗效乃籲天潛割股和  
藥以進親疾隨愈其他賑饑施棺修橋鑿井尤多  
義舉孫埴建百歲堂以奉享年百有三歲而終  
陳昂秀水人事母沈盡孝母邁危疾晨夕奉藥累  
侍牀褥間母忽思食鯉乃早起循溪岸行俄聞魚  
躍聲解衣入水得巨魚為羹奉母疾尋愈迨居喪

廬墓三年以誕晨祀母有一雁從天而下舒頸鼓  
翼馴擾庭中里人繪二異圖咏歌之具姚公綬傳  
後子孫多馴行孝謹九德甲子順天中式令潛江  
縣一德生子懿典今為編修一德亦膺褒封焉  
竇卿秀水人德藩典寶素以孝聞嘉靖間部使者  
下郡邑旌其門父嘗病足癰卿躬浣拭舐吮時時  
背負行母患脾虛急走叢祠密禱乞減齡益親笑  
父母並享年九十

沈壁秀水人正德間應詔輸粟助邊授千戶兄弟



五人最友善迨析產體父意推腴受瘠伯兄長鄉賦勞憊請以身代役季弟遭回祿即與築居比歿撫其孤給薪水事載錢薇誌中

節義

晉

李祥海鹽人隆安中從內史袁崧築滄瀆壘禦孫恩崧為賊害祥突白刃收崧歸塋時皆義之

五代

薛仁德吳中戎府右職倜儻好施為蘇州中令官

誥使自郊勞迄祖餞貺遺禮幣一萬餘緡禮畢還府過崇德堰見牽船人多荷藁薛驚異會令佐來謁因問之對曰崇德當驛路衝要所逋秋稅甚多堰後夫皆是物也薛曰今夕試與考覈簿籍實欠幾何明日艤舟相待令佐侵晨具籍呈之所欠九千七百餘緡薛欣然命從者閱視橐裝幾及其數捐舟送縣空載而去

宋

殷澄字公源華亭人家富好施每大雨雪載薪米



救寒餒又置棺槨濟人人目為殷佛子澄性介特  
生平無宿諾見義勇為元兵壓境澄猶保聚未下  
元將楊掃地者大怒命屠其境澄伏劍扣軍門曰  
民猶水也水順則流逆則激民順則從逆則亂今  
將軍不廣好生之德施不殺之威顧欲盡勦斯民  
乎楊怒欲斬澄屬聲曰即殺一人活千萬人死安  
足惜辭氣益壯楊感悟一境獲全丞相伯顏聞而  
義之授澄軍民都總管使守其地澄曰大宋之亡  
吾以親故不與俱亡乃獨不能逸乎遂野服放浪

九峯三泖稱泖南浪翁云

衛謙字山甫華亭人第進士調丞未行而元師及  
境童樞密聞謙邀與語奇之版授龍溪尹辭不就  
有鹽丁以妖煽掠海上分守千戶沙全疑邑民反  
側將勒兵殲之謙詣全開譬以身為質兵遂寢又  
舉謙為温州路治中復辭立義庄義塾惠教鄉族  
所著有讀易管見三十卷子德加字默禮閉戶讀  
書不就辟舉妻亡不再娶獨居三十年至正間盜  
起州里解散德加獨守祠墓不去盜義之不加害



張仲淳秀州人以文行知名居鄉教授好周人之急務行陰德不求人知偶一商疾薦採仲淳問其姓名鄉里言訖遂斃裝有十金仲淳自為具棺歛召其子護喪持金歸復捐貲經紀其塋事一夕夢死者謝仲淳云蒙公厚德無能結草公今生貴子矣已而生子師中舉進士為館職終京西漕使尚書工部郎中

陶菊隱嘉興人佚其名德祐末元兵南下菊隱聞勤王之詔散家財招集義兵以拒元謁文丞相于軍宋亡遺士流寓者多以為依戒子孫勿仕元當時同邑有趙孟偲華亭有殷澄稱秀州三義戴光遠字君實嘉興白牛鎮人鎮遠郡縣學校不立光遠乃辟地三十畝為殿宇學舍四十餘楹置師聚生徒百五十輩延名儒黃玠主之自是鎮人始知學

顧德玉字潤之嘉興人從寧國教授俞長孺遊長孺有道士然無子嘗語人曰吾昔寢疾于杭德玉侍湯藥情猶父子醫為感動弗受謝今我行且老



父寄之以死既而訪醫吳中病且革趣舟歸德王既死德王歛于家哀經就位邦人士為德王來吊德王谷拜葬海鹽歲時享祀惟謹

劉儼字敬先真定人父貞宦海鹽遂占籍焉儼博學善詩文娶瞽婦終身愛敬如賓門人蕭某貧卻其贄又恒周之友人沈德常死無所歸儼止田三畝鬻以葬焉

元

濮鑑字明之桐鄉人大德丁未大水滄禾鄉民苦

饑鑑捐米千餘石以食饑者所活甚衆有司上其事給授富陽稅務官加將仕郎

吳森字君茂其先汝南人徙居嘉善元至元間為管軍千戶饒贄好施與嘗捐田二頃建塾延師以淑鄉之後進廉訪使奏聞表其門曰義士

俞庸字子中嘉興人為平江路推官年饑穀貴流殍塞塗憲府檄庸董倉庾賑給全活數萬淮兵壓境庸募勇士鑰守盤門郡僚高安等謂庸盍不俱竄庸厲聲叱曰公等以世臣守大城一旦臨利害



嘉興府志 卷之三十一  
先民逋逃不顧義與恩耶高安持鐵簡擊庸仆地  
遂開門兵至城下庸未甦被擒置諸馬下頃之甦  
以計脫去微服間道歸淞久之太府知其人將授  
以爵謝之曰吳門之役吾有死所今日之生出  
幸耳尚負面授他命見天日乎因憤病卒年四十  
五

皇明

楊任嘉興人母張氏初生任有胡僧過之聞啼聲  
嘆曰此兒異日必顯終不免於刑再任至孝嗜學

洪武間由人才擢知袁州府黃子澄一見以國士  
許之守袁政多宜民北師起任引疾歸壬午事定  
子澄出徵兵往約蘇守姚善航海善不可子澄乃  
至任家與任謀求舊君以圖大舉事泄任與子澄  
俱被擒至京磔于市任子禮坐死籍產族誅  
陸琦字文珞汾湖人宣德中父坦將建學宮不果  
而歿琦承父命獻隙地復建義塾於汾湖之陰學  
士曾鶴齡為記

劉鳳字累儀曾祖恂大梁人任海鹽學諭因家鹽



嘉興府志 卷之二十一  
之陶涇鳳見沈家門水軍遇颶風有溺者每更番  
鳳憫之具疏上奏 朝廷下議責居民能保百年  
無事否鳳乃大置酒會隣里姻族曰吾願以百口  
保之設有事請伏辜咸諾遂覆 奏准罷沈家門  
之後但立堡增戍以防不虞後因子恭貴贈御史  
孫琦亦第進士科第相仍不絕云

陸宗秀平湖人宋樞密副使旋吉九世孫為人敦  
朴有至行與弟宗達宗俊友愛甚篤人比之楊椿  
津兄弟永樂甲辰應賢良詔徵至京會 仁廟新


御極宗秀方巾布袍引見 上異其禮貌從容命  
進扈前問曰如何則天下太平宗秀叩頭對曰  
皇帝親賢納善大臣秉公持正自然太平 上悅  
曰好言語公卿悚然留京師數日以疾辭 賜寶  
鈔銀幣還正統五年歲饑宗秀傾家出粟麥助賑  
事聞 賜勅褒獎表其門曰尚義之門棹楔至今  
存焉時有孫佐鍾鳴遠陸國平潘壁俱平湖人王  
全顏小童王顯保俱桐鄉人各出穀麥二千石助  
賑有司上其事 朝廷勞以羊酒旌為義民復其



家三年其勅語俱與宗秀同子珪字廷玉景泰六年饑疫明年饑益甚珪與弟璵瑜瑾共出穀五千餘斛以賑有司上其事 詔授珪迪功郎兄弟四人皆賜宴光祿珪以德義著於鄉鄉人有不平事皆就之取直不至官府邑初建學珪與沈氏共任之既成縣令酌酒祝曰願爾兩家世世衣冠弗絕也其後陸之孫淞沈之孫肆俱發解

張瑤字朝貢嘉興人舉鄉薦性孝友其妻以疾不悅於姑姑欲出之瑤心知其無罪令歸依母氏終身不娶與兄同孝養內外無間言屢上春官不第遂隱居杜門衣食不給恬如也郡守徐盈高其誼屢枉過咨論政事瑤未嘗干以私卒無以殮徐為具禮葬之

沈本秀水人世居邑之永樂里積織起家郡邑舉為萬石長守法奉公無侵漁正統辛酉歲饑有詔勸富民賑貸本首輸粟五千斛旌為義民表宅里未幾閩寇猖獗郡守帥民兵往禦之本毅然偕行無難色景泰癸酉募富民納菜以實邊本以白粒





嘉興府志 卷之二十一  
數百斛應詔將上道疾作屬子淳代往其輕財尚  
義至老不衰

吳淞字秀東秀水人舉嘉靖丙午鄉試數上公車  
不第選知靖州能戢苗獠使同編戶輸稅會山水  
驟漲民溺死無算淞亟懸賞格拯一人者予十緡  
又躬令人置筏湏未渡者州人德之貳守九江時  
湖口關值水衝商舶多壞淞曰寧算錐刀而傷民  
命乎請于觀風使者議草之商大稱便已遷福建  
鹽運使同知引年歸為人朴茂恂恂仁厚長者性

不事封殖而於族黨貧乏尤好施無倦歸田後足  
不躡公庭志操澹如也里中咸高其誼云

陶廷錦字公重前名萬鈞嘉興人嘉靖壬子舉于  
鄉孝友天植清介自持有隱行友人坐事逮捕暮  
夜持數百金授之且示以無還期立為封緘授婦  
其後友人事雪舉囊歸封緘宛然族兄鑰死無適  
為後者戚里欲立其子力辭割腴田四百畝為食  
貧計竟不受已任饒州司理陸鎮江府通判俱以  
廉能稱卒于官子涵中萬曆戊子領鄉薦



夏雷秀水人有叔壁客姑蘇餘三十年垂橐而歸病不起為治殯歛既辦微知吳人有巧負壁貲者索歸悉畀其叔母張氏無隱息故人樂松為怨家所構往來居間費數百緡松家至今尸祝之隣有少婦窺雷獨寢以餘桃啖之面發赤流汗脫身走晚被旌額賜章服里人以為榮子日葵句容邑令徐瓚嘉興人以功曹任廣東海陽巡檢職辦會當開礦聞父喪賈人饋之百金冀緩須臾行可亟發獲倍利瓚卻之曰父死之謂何又因以為利吾豈

以百金喪名節哉遂奔喪歸濱海人高其義為立卻金碑

馬呈圖海寧衛指揮嘉靖三十一年五月倭犯海鹽新塘嘴呈圖隨統本衛驍軍李咬住等協同把總王應麟奮勇攻擊生擒真倭二十四名次年四月初一日倭首八大王等自青村登岸流突金山白沙灣向南劫殺所犯官軍俱經摧敗呈圖提兵出城與賊鏖戰軍潰呈圖直入賊圍身被三十餘創殞絕今祀英烈祠



姚弘海寧衛指揮僉事嘉靖三十二年倭寇侵境督軍防勦屢獲戰功至三十三年九月與賊遇殺賊四十餘賊潰奔弘奮勇殺入賊巢被賊鎗死督撫題奉仍祀英烈祠

采煉海寧衛指揮嘉靖三十二年四月初一日倭寇海鹽馬呈圖先馳煉往策應兵潰煉奮不顧猶自血戰而死今祀英烈祠

湍朝海寧衛指揮嘉靖癸丑年間倭酋八大王擁眾由金山潛踰梁庄朝率千戶王繼隆等追殺與賊對敵朝斬倭寇一名不料賊匿廟中突出將朝殺死今祀英烈祠

徐行健海寧衛指揮嘉靖三十二年身經二十餘戰斬倭首三百餘顆生擒倭拾餘名後被殺死今祀英烈祠

李元律海寧衛指揮嘉靖三十三年倭奴入寇奉調領兵防守富陽等處擒斬倭賊十一名復追戰於益家堰地方克鋒陣亡今祀英烈祠

文苑



漢

嚴忌本莊姓避明帝諱稱嚴由拳人忌與司馬相如俱好辭賦哀屈原受性忠貞不遇明主而遭暗世乃斐然作辭歎而述之曰哀時命遭景帝不好辭賦無所得志聞梁孝王右文通賓客乃徒步入梁受知孝王與鄒陽枚乘俱見尊重而忌名尤甚世稱嚴夫子墓今在秀水新城鎮族子助郡舉賢良對策武帝善之擢中大夫帝務開邊屢舉賢良文學令助等與公孫弘辨論中外相應以義理之

文大臣數詘而助獨親幸吾丘壽王司馬相如東方朔枚舉不及也建元三年閩粵圍東甌詔助持節發兵救之助風諭南粵遣其子入侍又併諭淮南王發兵臨粵帝益賢助問所欲拜會稽太守久之不聞問乃賜書曰君厭承明之廬勞侍從之事懷故土出為郡吏間者闊焉久不聞問具以春秋對助上書稱謝詔留侍中後淮南王反以助嘗受賂遺帝意薄其罪御史大夫張湯論殺之歸葬由拳墓在今天寧閣後




朱買臣字翁子家貧好讀書不治家業常賣薪給食負薪行輒讀書歌謳之其妻負戴相隨數止買臣毋謳歌道中買臣愈疾歌妻羞之遂求去已而買臣詣長安上書是時同邑嚴助已貴幸薦買臣召見說春秋楚辭帝甚悅之亦拜為中大夫與助俱侍中俾難誑丞相弘時東粵黠反覆買臣言發兵浮海可席卷破滅乃拜為會稽太守居郡歲餘將兵擊破東粵帝壯其功徵為主爵都尉坐事免復起為丞相長史與御史大夫湯有怨告湯陰事

湯自殺買臣歸葬故里墓在今府城東四里其子山拊官至右扶風

晉

陸機字士衡抗之子少有異才服膺儒術抗卒頌其兵為牙門將年二十吳亡退居靜學太康末與弟雲及顧榮俱入洛人號三俊機造太常張華華素重其名禮如舊曰人之為文常恨才少而子更恨其多太傅楊駿辟為祭酒累遷太子洗馬吳王晏出鎮淮南以機為郎中令遷尚書中兵郎轉殿





中郎為趙王倫相國叅軍預誅賈謚功賜爵關中侯成都王穎起兵討長沙王又假機後將軍河北大都督被譖為穎所殺機天才秀逸辭藻宏麗冠絕當世所著文三百餘篇有集十卷今存詩賦論議箋表碑誄一百七十餘首弟雲字士龍六歲能文與機齊名號二陸吳尚書廣陵閔鴻奇之曰此兒若非龍駒當是鳳雛年十六入洛刺史周浚召為從事曰今之顏子也補浚儀令稱神明畫像祀之歷清河內史大將軍右司馬與兄機同遇害所

著文三百四十九篇新書十篇集凡十卷機在洛嘗著懷土賦以見志及與諸昆弟相贈答詞頗悲愴

于寶字令升其先新蔡人父瑩徙海鹽寶勤學博識好陰陽術數為著作郎平杜弢有功賜爵關中侯中興後領國史累遷散騎常侍著晉紀三十卷稱良史又著春秋左氏義外傳註周易周官凡數十篇寶始不信鬼神著無鬼論後見所殉父婢十餘年不死悟幽冥之理撰搜神記三十卷劉惔以



為鬼之董狐

梁

到洽父坦齋中書郎洽年十八為南徐州迎西曹  
行事洽少知名清警有才學士行謝朓文章盛于  
一時見洽深相賞好日引與談論每謂洽曰君非  
直名人乃亦兼資文武朓為吏部欲薦之洽觀世  
方亂深相距絕遂築室巖阿幽居者積歲樂安任  
昉有知人之鑒與洽兄沼漑並善嘗訪洽于田舍  
見之歎曰此子日下無雙遂申拜親之禮高祖召

為太子舍人御華光殿詔洽及沈洽從弟蕭琛任昉

侍讌賦二十韻詩以洽辭為工賜幣與陸倕對掌

東宮管記普通元年入為吏部郎請托不行遷御

史中丞彈糾無所顧望號為勁直

陳

顧野王字希馮海鹽人崇之後家東顧亭湖祖子

喬父烜俱有儒術野王七歲讀五經知大旨九歲

制日賦領軍朱异奇之十二歲隨父建安撰建安

地記及長徧觀經史精記默識天文地理著龜占



候蟲篆奇字圖畫無所不通父卒憂毀不勝喪聞  
侯景亂遂募兵援都天嘉中仕至黃門侍郎光祿  
卿卒贈祕書監右軍將軍所撰玉篇輿地志各三  
十卷符瑞圖顧氏譜傳分野樞要續洞略一百卷  
國史傳二百卷皆未就子安饒鴻臚卿

顧越字允南鹽官人祖道望父仲威家世儒學越  
少孤勵精博極微奧兼工文藻除五經博士朝廷  
疑義多所取決越以宮僚未盡時彥宣帝且有奪  
宗之心疏言太子天下本養善春宮輔弼丞疑未

極時選至如文宗學府廉潔正人當使晨遊夕論  
則非僻無從而入廢帝拜越散騎常侍兼中書舍  
人黃門侍郎所著毛詩老子孝經論語等義疏四  
十餘卷詩頌碑志牋表二百餘篇

唐

顧况字逋翁海鹽人居橫山善屬文工畫至德二  
載進士與柳渾遊渾秉政不舉况又與李泌善泌  
相亦不舉久之稍遷著作佐郎為有司所排貶饒  
州司戶累歲脫廢無復北意結廬茅山號華陽真



逸壽九十卒有集十五卷皇甫湜序之子非熊讀  
書一覽成誦好辨說氣燄凌轢為衆所仰久不第  
然名在朝野長慶中放榜非熊復下第穆宗怪之  
詔有司進所試追榜勅賜及第大中間歷盱眙尉  
慕父風棄官亦隱茆山或傳非熊得長生術云

宋

謝炎字化南嘉興人為文慕韓柳與盧稹齊名稹  
異懦炎勁急反相厚善時稱盧謝端拱初舉進士  
補昭應主簿徙伊闕連知華容公安有集二十卷

呂渭老字聖求嘉興人有文行宣和末為朝士有  
集行世

李如箎字季牖崇德人博學多文所著有東園業  
說晚以特科補官

呂仲庚字申伯嘉興人精學能文第進士官至大  
理正所著有九山集  
元

張伯淳字師道崇德人少舉童子科與趙孟頫為  
中表人品亦相望後以孟頫薦入見世祖問冗官



風憲鹽莢楮幣伯淳對皆稱旨命至政事堂將重用之固辭遂授翰林直學士謁告歸卒有文集若干卷藏于家葬縣西北一十七里孫烟武原縣尹築渠堰禦水惠民賴其功終湖州知府

朱炎崇德人五歲誦詩書七歲能作韻語十歲屬文及長博極群書有重名傷元亂隱居終身

皇明

江漢字朝宗會稽人有文行元季嘗客吳中經崇德濮氏延為上客留數載洪武初召為翰林院編

脩嘗應制賦詩賜緋袍後請老仍居濮院

周鼎字伯器嘉善人少警敏書一覽輒成誦既長以文學知名時有尚書金公征閩寇過嘉興鼎以布衣謁見金大奇之辟置幕府預參籌畫號令文符皆主之當以功上會金與他使者不協抑授沐陽縣典史未幾淮民饑奏請賑濟忤當道意遂罷歸鼎為文嚴整峭厲授筆立就尤工於詩浙西文士淵藪猶推鼎絕句為江南獨步一時學者多宗之所著有士苴集十卷行世



周澤字天雨嘉善人博學有才為文清婉詩亦工  
緻雖不多作每一言出人競膾炙之成化癸卯領  
浙江鄉薦第一登進士任嘉興府推官三年獄無  
寃滯陞福州府同知尋轉贛州奉

范言字孔嘉秀水人會同丙戌進士居官拓落自  
蒲圻令改學博歷國子監丞陞大理府同知致仕  
言博綜經史善屬文里中以為嚆矢時比部彭輅  
以文辭相頡頏范宗韓歐有體裁彭閱肆綺麗出  
入史漢名家各負氣不相下說者謂范馴謹而彭

文肆質龜落拓不羈卒自困以老言所著有菁陽  
集

湯日新字懋昭秀水人髫年銳志為醇儒時藝爾  
雅膾炙海內嘉靖庚戌魁南宮所至執經問業戶  
屢常滿宰分宜有惠政邑人貌祀之累陞兵科都  
給事中多所見畫然性醇謹弗敢甚引當否仕至  
通政以自陳免歸

郁天民字玄仲嘉善人性穎異讀書過目不忘督  
學五清劉公擢冠八學後厭薄舉子業肆力於古



文詞為詩援筆立就博極羣書於國家典故尤習著述頗富

項元淇字子瞻秀水人生有至性狷介寡儔不治家人生產居恒博學嗜古於書無所不窺工詩詞尤好臨摹古法善草聖每遊戲翰墨尺幅數行人競寶之嘗以貲拜上林丞非其好也遭內艱歸墓田丙舍卒歲食貧親知貴顯或遺之卻弗受時與騷人衲子往來唱和譚名理蓋超超玄箸云季弟元汴博物好古尤精繪事家藏丹青墨跡每欣喜意得輒摹臨題咏其間自命墨林山人

劉杰字季俊海鹽人幼穎敏讀書過目成誦初學禮於許伯全復受尚書于邵宏譽後棄舉子業專意學古通聲律書數長于詩文成化改元徵杰修英宗實錄晚年著作煥然德器淳雅卓為鄉士夫儀矩

沈燭字世明嘉善人性端嚴嗜學鄉舉後跡不入公府亦不事家人生業再上公車凡道路費悉謝弗受家居動遵古禮日闔戶手一編伊吾不輟與





弟炤相友善所著石聯遺稿行世子士立亦能詩  
武功

五代

高彥海鹽人事吳越錢氏征討有功奏授湖州刺  
史性淳厚政務簡便後復領費州刺史

朱行先字蘊之海鹽人猿臂燕額嘗從吳越征討  
累功歷檢校尚書右僕射佐正匡國功臣

梁

趙伯超嘉興人太清二年吳郡信義郡為侯景所

陷餘郡縣皆望風披靡伯超守錢唐其城堅不可

拔

宋

王子武宣和初為統軍睦寇方臘作亂橫行州邑  
殺平民二百餘萬莫敢挫其鋒來攻秀州陳于城  
南未一舍衆六萬號十萬子武與郡守宋昭年以  
邑城孤軍當之斬首五千築京觀五賊乃退據臨  
安不敢北向以窺江淮者由子武之功能道之也  
輔達本慶源人南渡家崇德有勇略屢立戰功紹



興末樞密葉審言視師江上集諸將問計請遽瓜  
州逵以為非計力陳萬全之策不從已而王師果  
敗如逵所料乾道中任後軍統制以戰圖進孝宗  
問屯田事宜逵以笏就地指畫上曰欲以邊郡處  
卿能勝任否對曰當以家法治之上問何謂家法  
逵對曰保安軍民愛惜財賦上嘉之除知泰州  
皇明

李文榮以貢歷北平行太僕寺寺丞謫戍北平遇  
靖難以守城擢江西叅議賜以奉天征討鐵牌一  
命部內寇發隨宜誅勦既而入覲賜襲衣致仕  
楊真義崇德人洪武初由軍校以討張士誠功陞  
錦衣衛指揮

鈕正戍北平以從靖難功歷官至留守衛指揮  
彭程海寧衛指揮僉事素負膽畧知天文正統間  
隨征閩寇鄧茂七景泰間從征浙寇葉宗留累立  
戰功陞指揮同知

滿正海寧衛左所正千戶正德間解軍器之京遇  
寇奮勇射退次滄州首寇劉六劉七臨境守臣欲



遁正激以忠義適胡世寧行次正遂協守與寇持  
八晝夜寇不能犯尚書張縉疏正功後從征開常  
深入被害贈明威將軍子潮陞指揮僉事  
陶炳海寧衛左所百戶高談善射正德初蘭錡聞  
一劒歟冲隨舉將才從征開常累征蔡六二王浩  
八陳邦四俘獲甚夥陞正千戶乃顏其堂曰瑞劒  
呂塘崇德人正德間由錦衣衛校尉以捕盜功歷  
陞副千戶

楊昇由小旗立功陞授羽林衛指揮世襲

張淮太僕張敏之子倜儻有大畧正德間蜀寇猖  
獗太僕兵備利綿有廖麻之難將軍聞變馳入願  
與父同死侃侃陳利害賊壯而出之後數從太僕  
軍中戰通江門鎮有斬獲功別從延緩叅將張鳳  
征倒塔兒等處斬首虜四人時內閣楊公一清行  
邊甚器重之授嘉興所正千戶例進蘇州衛指揮  
同知嘗建會龍橋以鎖郡城諸水有關風氣云  
金丹嘉善人卜居秀水少為諸生喜談淮陰睢陽  
事已坐誥誤當立功遂棄而學武龍韜虎鈴無所



不窺尤精著數能筭計見效會島夷內訌賈勇先  
登制府檄為間諜嘗從戚大將軍行間多所俘獲  
累軍功官至叅將已居家穆然儒雅不知其為故  
帥云

陳文治嘗為府吏坐舞文因棄桑梓奮跡行伍官  
至總兵歷漁陽上谷間捕斬首虜有功其後虜闌  
入弗及收保上功幕府不中率卒被劾瘦死請室  
朱先原籍秀水讀書不成棄學劒膂力膽氣干人  
薛易有封狼居胥意嘉靖間胡少保懸賞格購倭

首先所手刃凡數十盡以其首級獻而曰丈夫意  
在立功何以賞為胡公竒而用之歷疆場凡四十  
年累官總兵絕犖伎之好亦不置田宅園圃輕裘  
緩帶有古儒將風

馬繼武呈圖子父沒之後每以父讐未報為恨萬  
曆八年四月內有倭船泊岸繼武親督官兵戰於  
西磯海洋犁沉倭船生擒倭奴一十名親斬首首  
徯戍郎首級壹顆又於大陳洋岐外生擒倭奴二  
名斬首一十七顆師旋松門設父呈圖神位集前



後倭首列祭於前慟哭再拜以報父歿之仇移鎮江南地方副總兵官佐督撫周繼平劉汝國亂累陞右軍都督府僉事提督大教場水陸官兵總理備倭等務卒于官

嘉興府志第二十一卷終

嘉興府志第二十二卷

賜進士中憲大夫知嘉興府事安成劉應鈞重修  
賜進士奉政大夫南刑部郎中郡人沈堯中編纂  
賜進士朝列大夫南國子祭酒郡人馮夢禎參攷

嘉興縣學生員 胡戴元 校正

隱逸

晉 韓績字興齊其先廣陵人避亂居嘉興父建仕吳至大鴻臚績好文學以潛退為操布衣蔬食不交



嘉興府志 卷之三十一  
當世東士並宗敬之司徒王導辟為掾不就會稽  
內史孔愉疏薦詔安車束帛徵之不起卒于家  
何準字幼導廬江潛人穆章后父也寓家海鹽弱  
冠知名州郡交辟不就兄克驃騎令準仕對曰弟  
五之名何減驃騎蓋準第五也克後居宰輔權傾  
一時而準散帶衡門不與外事徵拜散騎郎卒不  
就後追贈金紫光祿大夫加晉興侯子恢以非父  
志表辭不受

齊

顧歡字景怡鹽官人六歲時父使驅雀田中歡因  
作黃雀賦不復顧雀食稻過半貧無所受業竊聽  
鄰人讀書悉記不遺傳吳興邵元之經學問館受  
徒常百餘人母喪水漿不入口者七日廬於墓次  
太祖踐祚迎歡稱山谷臣顧歡表曰道德綱也物  
勢目也湯武得勢師道則祚延秦項忽道任勢則  
身戮願稽古百王斟酌時用則率土之賜臣志盡  
幽深無與勞勢請即辭帝賜麈尾素琴有文義三  
十卷



嘉興府志 卷之三十一  
宋

謝國光字觀夫華亭人咸淳間對策春官言時事  
剴切主司畏賈似道不使登第補太學生代革不  
仕元治書侍御史程鉅夫奉詔搜賢或薦國光輒  
杜門稱疾以經史自娛及卒遺命題其墓曰安節  
謝國光之墓

董鎮字仲貞海鹽人深於經術有用世志值元  
亂遂隱海寧泉山

張葆光嘉興人市居讀易一目時明突出乃用蕉葉

方伎

熨眼且熨且讀遂超然有得見黃冕仲黃曰如師  
卦初長子帥師二弟輿尸三在師中吉極分曉光  
曰作如此說宜其易也乃削簡盈箱布算縱橫所  
謂八陣圖五花陣諸法無一不出于此冕仲駭服  
元

衛富益華亭人尚書仲達之後徙居崇德宋亡日  
夜悲泣設壇為文祭文天祥陸秀夫張世傑詞極  
哀慘聞者無不墮淚嘗從許謙輩游許卒以義制  
服有司數薦之以世受宋恩不出創白社書院講



學訓後壽九十六而卒門人謚曰正節先生

陸正字行正海鹽人今屬平湖正博學篤行通律

呂象數之學舊名唐輔宋亡與族父霆龍以家世

宋臣矢不仕元遂更名正御史數薦之不起隱居

教授其學以慎獨存心為要所著有正學編學律

考七經補註至治三年卒門人謚為靖獻先生立

書院于陳山奉祀

黃玠字伯成與趙孟頫遊尤與黃潛善平生慕郭

林宗黃叔度陶淵明之風不喜儲蓄有輟貸人晚

值兵亂益貧困處之泰然為詩冲淡夷曠後家并

山小隱吟錄知非舊稿唐詩選纂韻錄行世

吳鎮字仲珪性高介善畫山水竹石題詩其上時

號為三絕富室求之多不得惟贈貧士使取直焉

自號梅花道人其兄原璋嘗從毘陵柳天驥講天

人性命之學而仲珪亦嘗以易數設肆武川推人

休咎言多警世有嚴君平之風

皇明

沈啓隆字昌甫其父漁隱公居吳興勝國之季一



朝棄妻子跳之五湖隆遂徙嘉興郡城之東水南  
有園常吟嘯其中自號南園居士後徙思賢鄉豁  
達好施多建梵宇黎川羅漢寺肖貌于大士之側  
萬曆中松陵令江鍾廉有記叔子禮仍處舊廬構  
有草亭玉峯夏太常景圖其亭勝并顏東郭草亭  
四字鐫二石以傳

孫固字以貞雅致恬曠讀書談道辟署華亭縣學  
事與楊鐵崖陶南村友善嘗自扁其齋曰聽雪胡  
祭酒嚴為之記著有聽雪齋稿以玄孫植貴贈尚

書

徐晟海鹽人性資穎敏經史墳典靡不周覽與朱  
祚俱以博洽稱王大叅衡按海上命取韻府考事  
得之眉間註云出漢雋詢知晟命延入禮敬之問  
漢書數事詳對無失稱曰徐漢書所著有左傳摘  
事燕石存稿

沈鏗字大威少穎敏通經傳以父獨持門戶廼棄  
去舉子業為父任勞暇則輒取諸經史百家語誦  
之父母命受辟藩司嘗丞七家嶺非其好也至官僅





閱月得父書輒嘆曰古稱愛日又云以道養親老  
 矣吾寧繫斗粟為遂解官歸平生重然諾慎取與  
 與人交無訑辯調容恂恂相下犯之不校有過每  
 諷之使改隱不以言鄉稱長者年及耆即屏家政  
 時泛舟湖上與諸長老為會觴詠優游晚謝客樓  
 居二十年室無長物凝然終日內藏其精若常觀  
 於真微綿綿若存類古之知道者烏伯子光華仲  
 子英華皆以文學有聲庠序孫思孝舉進士任都  
 察院右都御史兼兵部左侍郎協理京營戎政

仙

項鑄秀水人太學生禔身節儉甘澹泊居恒謝客  
 讀書課子元灑領鄉薦偕計鑄與俱族人宦京師  
 者強之謁選授閩藩都事曰吾少無宦情烏用此  
 桎梏為也遂投檄而歸惟杜門株守以天年終  
 郁泰初名從周自幼神骨清爽嘗闔門靜坐時時  
 吟咏亦善鼓琴既為諸生登嘉靖乙酉鄉薦再上  
 春官不第即棄去瓢衲出遊或數年一歸省其母  
 遂去莫知所之嘗至南嶽遇異人有所指授後遇  
 張紫陽授大丹訣要乃還武林賣藥市中人無識



者萬曆壬午春期往建昌煉丹藥忽云吾丹道垂成而塵劫已滿吾將去矣遂默不言諸道侶守之索筆書云生天生地生物生人眾生遂瞑有詩賦一卷行于世人稱為雲陽先生

朱崇儒號憶雲初從羽士沉酣老莊已復潛心周孔為博士弟子尋棄去巖遊川觀或遊戲筆墨間摹山川草木人物皆入神品為人豪宕睥睨塵世滑稽似東方朔志慮似郭有道高潔似徐孺子或謂其有簡兮玩世之風

施謐字安甫思賢里人幼穎異終日危坐壹似有所悟者迨長父母強為娶養親盡禮比歿哀毀骨立盡以其產讓諸兄飄然物外徧走燕粵歷五岳洞天福地無所遇還抵虎林於勝果寺遇異人張野翁得授瞿曇宗旨嘗居郡城西南隅窮巷蔀屋袒褐蕭然縉紳賢豪多樂與之遊戶屢常滿視之泊如也享年九十無病而逝

袁仁字良貴嘉善人父祥祖顯皆有經濟實學至仁愈邃天文地理曆律書數兵法水利之屬靡不



嘉興府志 卷之三十三  
熟諳謂醫賤業可以藏身濟人遂寓意於醫崑山  
魏校疾召仁使者三至弗往謝曰君以心疾召當  
以咀仁義炮治禮樂以暢君之精神不然雖十至  
弗來也校疾愈訪仁與語三日大驚遂定交焉顯  
嘗作春秋傳三十卷祥作春秋或問八卷以發其  
旨仁復憫世儒溺胡而不信也作鉞胡編以闡之  
為文根本六藝片詞尺牘率關世故詩斐然逼唐  
卒之日沐浴更衣坐正寢呼筆題詩有附贅乾坤  
七十年飄然今喜謝塵緣之句投筆而逝

屠孟玄字伯玉諭德公伯子穎悟絕人博通經史  
諸子百家之言諭德公以國器期之公亦自負益  
勵志讀書以大父康僖公蔭讓之庶伯之子鈞三  
入棘闈~~魁~~不一第遂棄去精心課子謙登隆慶戊  
辰進士選比部司理淮上轉入吏部公膺褒封人  
以為華而公泊如也角巾短笻日與昆季徜徉于  
山水間每出入乘小舫一編自適公府慕其高誼  
有欲見者輒謝不見人比之五柳先生云

流寓



嘉興府志 卷之二十二  
施延字君子沛國蘄人寓海鹽明五經旁通星官  
風角家貧嘗任作半邏亭食其力以養母人不識  
也山陰馮敷為吳郡督郵過亭延持筵往敷知其  
賢下車謝之推食解衣與之錢不受順帝初徵拜  
侍中位至太尉

王昇字逸老京師人草書奇偉宣和間入御書院  
補右爵南渡時居崇德之羔羊高廟畱神翰墨近  
臣有言其能者召對賜以劄書褒賞眷異官至正  
使

江珪字伯持本嚴陵人父邈吏部侍郎紹興中奉  
祠寓樵李以父恩知六合字凋瘵有恩通判瓊州  
撫御群黎安靜無擾移知梧州夏潦江暴漲民廬  
漂蕩珪拯溺賑饑全活甚衆弟璆字鳴玉嘗使虜  
錄功知饒州妖人孫牧執左道惑衆收捕之被旨  
褒加除直秘閣提點諸路坑冶鑄錢地產登耗治  
鑄利病悉究源委知辰州

常同字子正臨邛人政和末上舍及第建炎初除  
侍御史有直聲遷御史中丞忤秦檜以顯謨閣學



嘉興府志 卷之三十一  
士出守湖州遂寓海鹽自號虛閒居士卒贈少師  
謚忠毅二子祿衿皆典郡有聲其孫濬孫詵孫濬  
第進士又舉博學宏詞為福州教授福人祠之  
朱敦儒字希真本汴人天性曠達以詞章擅名南  
渡寓郡城有讀書堂在天慶觀右

時檄字傳之彭城人建炎間家崇德歷知和州居  
官廉敏惠愛尤長於識鑑嘗擇壻得湖州張孝祥  
及同邑莫元忠時元忠處約辭以非偶檄笑曰莫  
子當為令人豈久貧約者卒妻之後孝祥元忠皆

及第為時名士


陳與義字去非汝州葉縣人兒時已有文名政和  
初上舍甲科宣和中徽宗見其賦墨梅詩遂登冊  
府歷徽猷閣直學士知湖州紹興間掌內外制叅  
知政事以任道德尊主威振紀綱為務乞外除資  
政殿學士復知湖州卜居崇德青墩鎮與義不妄  
言笑接人甚和而中不可犯薦士不使人知為詩  
體物寓興與陶謝常柳相上下崇寧後風雅幾廢  
與義獨以詩名中興有簡齋集二十卷行世



顏復字太初本曲阜復聖公裔宋禮部尚書建炎  
 扈駕家崇德石門鎮北子孫自為村落名陋巷村  
 葉時字秀發本仁和人第進士歷事四朝官終龍  
 圖閣學士操履端方博學善屬文邃於周禮晚居  
 嘉興著禮經會元及竹垞詩集行世卒謚文康  
 王明清字仲言本汝陰人銍之子慶元間寓居嘉  
 興官至朝郎有史才嘗著揮塵錄及玉照新志行  
 于世

李鳴復本瀘州人寓居嘉興之東門理宗朝拜叅  
 知政事後為福建安撫使予祠卒於嘉興子公夬  
 公晉皆典部

趙孟偲宋宗室其先家黃巖文天祥見之曰瑚璉  
 器也其後天祥開闢江東浙西俱辟以行及召赴  
 闕孟偲畱吳中僅五十日宋亡元兵執孟偲欲官  
 之固辭以疾遂去吳依親友以居絕口不談宋事  
 游情佛老號三教遺逸居嘉禾及天祥卒為文祭  
 之慟絕復甦臨終口占曰王室之懿文山之客千  
 古忠赤端坐拱手而逝所蓄詩文名湖山汗漫集





黃正孫字長孺本慈谿人宋宗正少卿震之孫宋  
已絕意仕進徙居嘉興之魏塘文行為學者領袖  
年八十一而終黃潛銘其墓

錢顛字道安無錫人治平末為殿中侍御史熙寧  
新法行顛極言其弊坐貶徙秀州遂分居焉家貧  
母老每貸親舊以給朝哺怡然自如

陳世昌本錢塘人力學古文元至正初由布衣入  
為翰林編修代祀海上值道梗遂畱嘉興授徒養  
母張士誠據平江屢致不屈本朝洪武初徵修禮

書授太常博士尋以母死辭歸後復徵至京而卒  
所著有希賢集

高巽志字士敏本蕭縣人元末寓嘉興師事宣城  
貢師泰番陽周伯琦遂昌鄭之佑為文有規模成  
一家言以薦起鄮山書院山長洪武初徵修元史

為翰林編修累官至侍講學士太常少卿卒謚文  
忠弟正志字士表濮州同知以清慎見稱

高岳字彥高本畏吾氏高昌裔也大父仕元為江  
南行臺御史中丞高博洽有才華儀容秀整人望



而敬之工草書丹藥卜筮之術咸究識之洪武間薦知雲南縣免官寓家郡城又嘗寓魏塘云

徐一夔字大章天台人博學善屬文學士危素薦為建寧路教授元末夔避地嘉興洪武初徵修元史終杭州府學教授以文行推重當時有始豐藁行世

夏尚字時正以字行更字季爵慈谿人宣德間縣學新設缺弟子員尚自仁和諸生來補後登進士仕至南京大理寺卿博學強記詩文書法皆冠一

時居官亦有譽望為刑部郎中時有獄不決者咸願就夏折之晚歲文益工營巢居閣于西湖所著有瀛嶼稿家禮若干卷

施懋字以德應天府人善詩文字有蘇法以鄉貢授龍泉學諭改訓北京武學陞孝豐知縣致仕官無全貲家無畱業挈其妻子寓秀之醋坊橋懋嘗從南都侍御戴簡庵學乃與其子經為忘年交後以詩歌相倡和往來益密遂相依而居年七十七以壽卒經為營壘于大彭之野



嘉興府志 卷之二十一  
孟觀亞聖五十四代孫祖孟忠厚扈宋南渡封信  
安郡王賜第姑蘇子孫遂為吳人國初觀應人才  
詔授永寧知縣有治行陞吳府審理副避兵寓于  
嘉善之清風涇後白于官建亞聖祠給裔孫衣巾  
守之

王輔字時佐海鹽人宣德中父聰謫戍遼東廣寧  
生輔幼有美質讀書過目成誦天順己卯山東中  
式居嫡母喪葬盡禮哀感鄉閭服滿授刑部主事  
為人沉毅敦朴鞫獄詳慎人皆稱平卒于京歸葬

海鹽曾孫王家棟登萬曆甲戌進士

朱孟德海鹽人寓陝西寧夏衛中永樂戊戌進士  
任鄭府審理改廣東興寧知縣善詞翰子俊中天  
順壬午鄉試任河南扶溝知縣

俞綱字宗正嘉善人寓籍上元為諸生改隸順天  
舉修 宣廟實錄歷中書舍人郟王受封簡輔導  
詔綱侍講歷陞太子少保兼兵部侍郎改南京禮  
部為人和厚縝密無疾言遽色謹身率職稱為長  
厚君子子文煥以蔭為福寧知州



嘉興府志 卷之三十三  
薄淳海鹽人寓貴州普安衛中成化戊子鄉試任  
南鶴慶軍民府推官

沈階海鹽人寓直隸永平府灤州中順天府成化  
癸卯鄉試陳紀海鹽人洪武間遷居南京中成化  
乙酉應天鄉試

沈藻海鹽人寓成都護衛中成化乙酉四川鄉試  
任陝西西安府教授

張正海鹽人寓雲南鄉試第一登成化丙戌進士  
任南京戶部郎中陞福建建寧府知府

張渭海鹽人寓陝西蘭州衛中成化丁酉鄉試  
黃衷海鹽人四世祖紹宗以舉人任陝西王府教  
授寄籍咸陽縣衷遂于陝西中式嘉靖丁未進士  
陸宗淵嘉興人寓貴州中嘉靖辛酉鄉試官刑部  
主事

嚴清嘉興人大德間徙雲南父鎡潛心醫術多起  
人危疾清舉進士清苦自持歷官吏部尚書祖墓  
在東關外官為建坊扁曰慶流滇浙其族姪即給  
事嚴從簡也清卒謚曰恭肅



嘉興府志 卷之三十三  
桑慎字仲修世居常州遷嘉興性孝友苦行力學  
洪武初為監察御史見事廷諍朋友有過輒面折  
之以行部海南奏誅衛使張榮坐不避八議罪謫  
瓊州安置後召還

張文憲字廷鑑其先崇德人洪武間曾祖光顯充  
肅藩護衛旗後遷京師因家焉公生而岐嶷七歲  
即善八法以神童薦於朝 孝宗親試乾坤二大  
字稱旨送翰林院讀書給以廩餼一時名公巨卿  
俱呼為小友嘉靖癸未進士歷官至工部尚書端

疑詳慎正直不阿出入禁秘四十餘年侍經筵修  
國史玉牒凡諸綸綍多憲屬草前後蒙賜御製諸  
書金幣不一舉朝榮之然嗜義樂施悉以分給親  
故弟姪同居聚食綽有公藝風辛酉以旱灾自陳  
欽命以禮致仕囊無餘積晏如也年八十有七卒  
上悼之遣官諭祭命有司治塋域又令刻爻山文  
集都城爭珍襲之亦曠世渥典云今嫡孫仍歸崇  
趙文華字原實慈溪人因娶項氏遂居秀水嘉靖  
間島夷內訌文華奉命祭海後復自請督戰遂以



工部尚書兼右都御史提督軍務時徐海陳東麻葉擁衆數萬分寇江浙暴骨如莽總督胡宗憲用間囑海卒陳麻二酋而海引衆乞降衆議撫之便文華曰一日縱敵數世之患也今以款去而後乘虛復來誰執其咎于是部署諸將并力攻之賊盡殪自是江南始無倭患雖宗憲定謀而文華實主之國史載其憑籍分宜揣結上意以睚眦傾張經李默為人所切齒平倭後驕盈愈甚卒取禍敗然其功固不可泯云

張汝賢嘉興人寓北京武功衛中萬曆甲戌進士湖廣辰州知府

吳國倫原貫嘉興以祖戍湖廣

衛遂家焉生

而穎異善屬文年二十六省試第一次年登進士是時都下有七才子齊李攀龍謝榛吳王世貞宗臣徐中行南越梁有譽而國倫則楚才也以著述自喜籍甚縉紳間歷宦燕及東楚閩粵貴竹大梁足跡半天下以故詩文獨雄年五十四謝方岳歸卧林下遠祖墓在虹橋東畔有感舊詩



醫術

嚴子成字伯玉其父秋蟾自河南買藥秀州遂家  
馬伯玉益精父術趙文敏公遘疾已殆伯玉診治  
翼日迺瘳文敏繪孫思邈圖遺之

蔡孟熙桐鄉人知藥性善方脉兼工詩文以醫舉  
授越府良醫公卿多愛重之戶部尚書廬陵周公  
忱有記

徐樞字叔拱其先宋濮陽太守熙遇異人授以扁  
鵲神鏡經頓有所悟遂以醫名世父號神翁元海

鹽州醫學教授樞少傳其術兼學詩于會稽楊蕪  
夫會天下亂晦迹田里洪武乙亥年四十餘始以  
薦為秦府良醫正出丞棗疆召為太醫院御醫  
累奏奇績陞院使告歸展墓宣宗親賦詩送之  
年八十致仕有足菴集行世子彪字文蔚亦以醫  
名治代王及昌平侯楊洪病皆起于危殆遂擢  
御醫陞院判每入侍疾景皇嘗問藥性遲速對  
曰藥性猶人性也善者千日而不足惡者一日而  
有餘問攝生對以固元氣隨事納忠類此



嘉興府志 卷之三十三  
韓履祥號採芝海鹽人精醫洪武間受知 高皇  
擢太醫院御醫成祖尤加眷遇巧于切脉隔歲懸  
斷不爽董谷撰傳

陳以誠嘉興人善詩畫尤精于醫永樂間應薦隸  
太醫院累從中使鄭和往西洋諸國擢院判歸卒  
有詩云九重每進千金劑四海曾乘萬斛船迄今  
道之

多珪字廷肅魏塘人精于醫治疾有奇驗一婦姪  
及八月卧不語衆醫歛手珪曰此內經所謂瘖也

十月當不藥自愈又有男子請診珪曰此疾不致  
死然脉無生理過三日當投劑期內忽溺死人咸  
異之其精妙類是名動浙右無子贅吳江袁祥以  
保嬰為業祥之子仁俱以善醫名珪所傳也

姚能字懋良晚號玉冠道人少習舉業屢不利棄  
去攻醫好吟咏每談論壓奪湍坐著醫書有傷寒  
家秘心法小兒正蒙藥性辨疑

朱儒字宗魯其先吳江人遷秀水昆弟四人儒祈  
產讓弟自用醫顯已入都會大疫所甦起亡算貧



嘉興府志 卷之三十三  
者皆不受直選授太醫吏目後績資為院使嘗侍  
疾禁中一日 上御文華殿暖閣召儒切脉儒奏  
聖體病在肝腎宜寬平以養氣安靜以益精上首  
肯之自兩宮太后及后妃公主有疾率令中涓言  
狀從儒受方多效時有大官之賜故嘗曳裾公卿  
間恂恂儒雅絕無所濡跡縉紳爭為倒屣每里中  
子入都儒戀戀桑梓客死者嘗倡義經紀其喪人  
皆德之年七十有七而卒子國祚癸未科廷試為  
第一今為禮部侍郎

賀岳字汝瞻少業儒因母病求醫弗效乃盡購岐  
黃書誦之四方國手悉訪從遊遂精醫 行母以壽  
康後鄉黨凡有疴厲爭迎岳視之圭勺一至隨手  
奏功著有明醫會要醫經大旨

方技

唐開元間數賜州縣大酺嘉興百戲角觝與司監  
競勝有囚善眩能以繩為戲獄吏乃白之監主召  
至戲場令効繩技其人躡躡捧繩可百丈許置地  
因引繩擲空中初高二三丈身四五丈若有人牽



而上者衆大驚異後乃投繩空中高十餘丈不見  
端緒其人隨繩騰上高二十餘丈如鳥旁飛遠颺  
望空而去竟不知其所之

宋賈宣伯有神藥嘗遇松江得巨魚置於罟中因  
投小刀圭藥魚引吸中即死取視得八足若爪利  
焉後吳江有怪士人謂蛇為孽宣伯以數刀圭投  
潭中明旦老蛇死浮於水而水蟲莫知其數其藥  
云受之閣皂山王天師止熬黃柏末以熱酒沃之  
別無他物豈仙方邪

陸晁嘉興人性疎逸善丹青多畫村野人物酒後  
遇筆揮灑畧不預構時南唐李璟聞晁名欲召之  
人謂其嗜酒無人臣禮璟由是疎之

李甲字景光華亭人作翎毛有意外趣海岳外史  
嘗稱之東坡題其畫曰郭恕先之後一人

唐希雅嘉興人妙于畫竹亦工李後主金錯刀書  
有一筆三過之法雖若甚瘦而丰神有餘喜作荆  
檟荒野氣韻蕭疎多得其趣非圖畫家繩墨所拘  
也



魯之茂號雪村海鹽人善畫梅竹宋寧宗朝仕為  
郎

趙孟淳字子真平湖人子固之弟繼秀安僖王後  
自號竹所梅竹可觀

元吳先生善易筮日惟一課得錢米衣肉共實一  
窟中時為人竊去不問也太學生無錫戴士先母  
病孿不能行七八年矣百計求愈疾不驗士先歸  
過崇德攜百錢訪之吳曰觀君寒士百錢豈易無  
用許自為揲卦成曰當得有道之士治之則可姑

蘇杲道人不為勢利所誘君純孝性敬求必如志  
士先抵蘇五旬逢杲道人欣然至無錫為戴母診  
視數日即能移步毋拔金釵謝之笑曰且寄夫人  
處他時要用即取之但館我於外足矣館之歲餘  
忽言曰我且死幸鬻所寄釵以辦棺窆明日果死  
戴氏奉其教及將窆中已空空矣吳蓋異人也鄉  
人尚能言之

朱碧山元時銀工也所製酒器極精巧如鰕盃鱗  
盃之類不施藥鐸注酒自能流走至今人珍之



明冷謙字啓敬春波門內人洪武初為協律郎郊  
 廟樂章多其所撰有友貧不能自存謙於壁間畫  
 一門命其友入恣取金玉以出而不覺遺其引他  
 日內庫失金守歲吏持引姓名迹捕之因并執謙  
 謙渴求飲拘者以瓶汲水與之謙且飲隨以足插  
 入瓶中身漸隱拘者惶急謙曰無害第持瓶至御  
 前拘者如其言上問謙瓶中輒應擊碎之片片皆  
 應竟不知所在後有人于蜀中見之

盛懋字子昭魏塘人父洪甫善畫懋世其業山水

人物花鳥之類種種臻妙始學陳仲美而畧變其  
 法人謂精緻有餘特過巧耳其姪著字叔彰能全  
 補圖畫運筆着色與古不殊洪武中供事內府  
 高皇帝異之著盛叔彰全畫記

王立本工畫山水人物師盛懋臨摹逼真

范摹字行式涉獵經史善詩歌多藝能凡金石款  
 識篆刻書畫之類皆能著其時代辨其真贗工畫  
 山水人物筆力瀟洒意趣幽遠

胡日章號樂素澈浦人嘗遇異人授以星術為人



推命每作絕句詩斷人貧富貴賤壽夭百不失一  
年九十六尤能燈下細書蓋有道而隱于術者方  
洲先生像贊曰百世之儒裔一鄉之俊傑

海州司馬常敷適嘉興道遇釋子希遁深於繕生  
之術又擇用日辰可代藥石見敷鑷白曰貧道為  
公擇日更之越五六日僧請鑷其半及生色若驚  
矣凡三鑷之鬢不復變座客有祈鑷者且強之僧  
言惜取時差爽耳後髭色果微綠意其術出于遁  
甲故號希遁云

翰

董常嘉興人工道釋像筆力細而勁拔

朱端字克正海鹽衛後所人馮山水可方輞川正

德間以畫士直仁智殿授指揮俸欽錫一樵圖書

朱俸字廉夫初游庠棄去攻字學考訂偏旁訛謬

得六書旨精篆籀古文及漢唐隸法每做管夫人

書七十二篆金剛經人珍重之

胡齋初名浚字元海陶庄人徙居魏塘賣卜于市

言多竒中其學蓋得之同邑袁杞山其母即袁之

姑也二人相約遊金陵寓神樂觀提點姚一山偶



嘉興府志 卷之二十一  
失金杯酷責其徒二人憐之占得剝之願告之曰  
金在土中未已也汝弟從房之西南隅掘下五寸  
則得矣如其言果得杯永樂八年一山薦二人于  
上袁稱疾不行胡至京卜無不驗賜今名免其匠  
後授欽天監漏刻博士上新作殿命之卜布算訖  
跪曰某月某日午時當燬上怒囚之以待至期倩  
獄卒覘視返報曰午過矣無火胡服毒午時正三  
刻斃果焚上急召胡則死矣甚惜之賜馳驛歸塋  
其子四人昊昊昱昂皆棄占筮而學畫會孫昺遂

以善畫名山水人物尤精命初下表為胡卜得乾  
之五爻袁曰五屬君升陽在四子命又午也其有  
錫名之慶乎胡曰吾直壬午壬為水而午者子之  
衝也果錫名必不離水袁曰非徒然也四為淵又  
值升陽而五居淵上淵而大者乎以草莽之臣踐  
五位終非吉兆五為火丁者壬之合也遇火則危  
矣後聞賜名齋袁大笑曰驗矣死不遠矣果因殿  
焚而卒

董仲敬善觀天文諳推步之法以術鳴任欽天監



挈壺正

蔡孟頫桐鄉人善方脉知藥性兼工詩文以醫鳴舉授

張德剛西塘人父成與同里楊茂俱善髹漆剔紅器永樂中日本琉球購得之以獻于朝成祖聞而召之時二人已沒德剛能繼其父隨召至京面試稱旨即授營繕所副賜宅復其家時有包亮亦與德剛爭巧宣德時亦召為營繕所副



